




O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

IUNI 2014

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

“O le Alofa o le Faasinomaga lea o le Ekalesia”

**Pepa mo le Fono Tele, saunia e
le sui o le Mafutaga a Tina:
Rosettastone Iupeli**

Autu: “O le alofa, o le faasinomaga lea o le Ekalesia.”
“Love the EFKS Vision and Mission.”

“Aua ne’i ia te i matou, le Alii e, ‘aua ne’i ia te i matou, a ia tuuina atu le viiga i lou suafa, ona o lou alofa ma lou faamaoni.” Amene.

**O le Mafuaaga o le Pese:
Have Thine Own
Way, Lord!**

silasila itulau e 7

**O se tala mo Matua ma Fanau
Toe Vaai ia
‘Oe i le Taeao**

Ona o lo’u tina ma ona talitonuga, o le mea lea ou te le fefe ai i le oti. O ia o la’u uo sili ma lo’u faiaoga uiga ese. Soo se taimi lava ma te faamavae ai, pe o le a
faaaauau itulau e 10

Ou te tula’i atu i le ava tele ma le migao i luma o lenei mamalu, a o faavaotutu’i le Ekalesia e lipoi

upu aua sona lumanai manuia ae faasilisiliina ai le viiga o lona
faaaauau itulau e 2



Faapa’ia le Maota fou o le Aulotu i Apia

O le maota fou leni o le aulotu EFKS i Apia, na faapa’iaina i le Aso Toonai 28 o le masina nei. O le fale ua suia ai le fale ua leva tausaga o tai, ona na faaleagaina nisi vaega i lologa ma le afa o Eveni i le masina o Tesema i le tausaga e 2012.
faaaauau itulau e 15

O le Alofa Uiga Ese

Sa tumu lo’u loto i le ita ma le inoino. Ou te ‘o’ono i le ita e le faaalua mai i fafo, ae peisea’i e

mumu faaafi i totonu o o’u lagona. Ou te faasiasia ma le fialia i tagata,
faaaauau itulau e 11

“O le Alofa o le Faasinomaga lea o le Ekalesia”

faaauau mai le itulau muamua
Suafa Paia.

Ou te faatalofa atu ai i le paia o le Laulau i lau Afioga i le Taitaifono, Sui Taitaifono ma le Laulau a Fono. Faatalofa atu foi i le itufale le la o Tama o le Ekalesia, le saofa'iga a nofo a Komiti ma le 'au mafua malu o usugafono filifilia mai nofo a Matagaluega.

Tau lava ina fesoasoani mai pea le Agaga, ia uluulu mata folau ai, lona mafanafana ma lona filemu i loto ma faamoemoe o lana Ekalesia.

Ae ua ou manatu o le a se'i papa aveloa ia se taumafaiga vaivai a le auauna, tusa ona poloa'iina ai e lenei Fono Tele 2014 se sui o le Fono Aoa o le Mafutaga a Tina.

E sii le viiga ma le faafetai i le Atua, ona o lenei avanoa faaauuro, o le a faasoia atu ai ni ou lagona faatina, faauso, faatuafafine i le Tala Lelei. O ni o'u mafaufauga faavae i le manatu autu o le Fono Tele.

Ua ou otooto mai i Afioga pa'ia a lo tatou Alii, nisi o upu sii poo fetalai e taua i lo'u malamalama faigofie ma le faatauvaa. Ae faaopoopo atu lava na o ni nai manatu ua ou maua mai i la'u foi savaliga faatina Kerisiano, faatina i totonu o le aiga, faatina i totonu o le Ekalesia. Ou te faaogaina le gagana faigofie, ne'i sese se faaupuga ona avea ai lea ma sala i luma o le faapotopotoga mamalu o le Fono Tele.

ALOFA - LOVE: ALOFAGIA - ALOFAINA - FEALOFANI - LEOLEO MAMOE - PUIPUIA - LELEIGA - FILEMU - SAOGALEMU - FAAFAILELE - TAUSIA LELEI - TULAFONO FAAAURO

“E le uma le alofa.” 1Kor. 13:8:
“Ona fetalai atu lea o Iesu ia te ia,

‘E te alofa atu i le Alii lou Atua ma lou loto atoa, ma lou agaga atoa, ma lou manatu atoa. O le poloaiga muamua lena ma le sili. E faapea foi lona lua. E te alofa atu foi i le lua te tuaoi, ia pei o oe lava ia te oe.” Mataio 22:37-39.

“Aua ua atoatoa le tulafono uma lava i le upu e tasi, o lenei, ia e alofa atu i le lua te tuaoi, ia pei o oe lava ia te oe.” Kalatia 5:14.

“E le agaleaga atu le alofa i le la te tuaoi. O lenei, o le alofa o le atoatoa lea o le tulafono.” Roma 13:10

“A o lenei o tumau le faatuatua, ma le faamoemoe, ma le alofa, o na mea e tolu, a o le sili o na mea o le alofa lea.” 1 Korinito: 13:13.

“O i tatou foi, ua tatou iloa ma ua faatuatua i le alofa ua i le Atua ia te i tatou. O le Atua, o le alofa lava ia; o le tumau i le alofa, ua tumau ia i totonu o le Atua, o le Atua foi oi totonu ia te ia.” 1 Ioane 4:16.

O le alofa e fusifusia ai mea lelei

**Poo le a se “gagana
o le alofa” e mafai
ona faatino ai le
autu o le Fono Tele
2014: “O le alofa, o
le faasinomaga lea o
le Ekalesia?”**

**What is the best
LOVE
LANGUAGE
we can use as we
continue to serve
our God in our be-
lief that “Love is the
EFKS vision and
mission.?”**

ma mea amiotonu uma lava.

FAASINOMAGA - VISION:

MITI - FAAALIGA - PRINCIPLES - CONCEPTS - PREDICTIONS - GUIDELINES-VALOAGA - TA'IALA - MOLI PUPULA - FAATA'ITA'IGA LELEI - IDENTITY.

“O lenei, alu ia ma tusi lenei mea i se papa i o latou luma, ia tusi ai foi i se tusi, ina ia tumau i aso amuli e faavavau faavavau lava.” Isaia 30: 8.

“La'u fanau e, 'aua ne'i tatou alolofa tau o le upu ma le gutu, a o le amio ma le faamaoni.” 1 Ioane 3:18.

“Ou te tusi atu ia mea ia te oe, oloo faamoemoe a'u ou te vave alu atu ia te oe; ae afai ou te tuai atu, ia e iloa ai lau amio e tatau i le fale o le Atua, o le Ekalesia lea a le Atua soifua, o le poutu foi lea ma le lagolago o le Upu Moni.” 1Timoteo 3:14,15.

Where there is no vision, the church will perish.

**EFKS CHURCH - EKALEZIA
FAAPOTOPOTOGA
KERISIANO I SAMOA MA
ATUNUU I FAFO - LOTU-
TALITONU, FAATUATUA -
FAAMOEMOE I LE ATUA LE
VAAIA - MULIMULI IA IESU -
FAAOLAINA E IESU -
MAMALU-PAIA-TAPUA'IGA
- TAUTUA - FAAEVAGELIA -
FAAMALOLOGA -
FAAFOUINA - FAAVAE MA
I'UGAFONO - TULAGA TOFI
E TA'ITA'IINA LE EKALEZIA -
FAITAILAGA.**

“Aua o le tane o le ulu ia o le ava, pei o Keriso foi o le ulu ia o le Ekalesia, o ia foi o le faaola o le tino. O lenei,, faapei ona usiusitai o le Ekalesia ia Keriso, ia faapea foi fafine ia latou lava tane i mea uma lava. O outou tane, ia outou alolofa atu ia outou lava ava, faapei o Keriso foi ona alofa mai i le Ekalesia, ma foaiina mai e ia ia te ia e fai mona sui.”

faaauau itulau e 6

O LE LAUGA

Tusi Faitau: 2 Korinito 9: 1-15

Matua: 2 Korinito 9: 7: “Ia ta’ito’atasi ma foa’i e pei ona filifili i lona loto, ‘aia ma le tiga, ‘aia foi ma le faatauanauna, aua e alofa le Atua i le ua foi ma le loto malie.”

O le ola foa’i; o le ola faasoa; o le ola faamatalatala atu o tatou lima e faasafua atu faamanuiaga; o le agaga tonu lea o le matua. O le tasi lenei o vaega taua o le ola faatagata Kerisiano e tatau ona malamalama lelei i ai tagata Kerisiano ina ia loloto ma tamaoaiga ai o tatou olaga aemaise lo tatou tali atu i le finagalo o le Atua.

Fai mai upu o le atamai faa-Samoa: “E tupu mea aveia, ae le tupu mea taofi pea.” Ai o le mea lea e faitioina ai e isi aganuu le aganuu Samoa ona e iai le vaega taua lea o olaga o tagata Samoa, o le ola foa’i, e le faigofie ona malamalama ai le toatele. O le tali malo a le Samoa, e pei o ina e faatetele iai le faaaliga o le ola foa’i o tagata Samoa. E ta’u loa o le a iai malo, poo le a lava le matitiva o se nuu, poo se aulotu, poo se aiga, e saili lava mea sili mo malo.

E foliga mai foi e fai mea faatoetoe ma fai mea faapolopolo le tagata Samoa ona ne’i meaane ua le tagolima le ola fai faalavelave ma le ola osiaiga o le Samoa. E iai foi le talitonuga faa-Samoa “o le afifi atu ma le afifi mai”; “o le avatu ni lo ae aumai ni lo.” O le aga a tagata Samoa e fai ai lona ola osi osi ina ia mafanafana sootaga ma suamalie le ola fetausia’i o paolo ma gafa.

E tele foi ina le malamala le toatele o tagata, e oo lava i isi tagata Samoa, pe aisea e folafola ai mea e foa’i e tagata Samoa, e oo lava i foa’i i totonu o le Ekalesia. O le mea moni lava, e ala ona folafola e le ina se’i tauanau ai le ola foa’i o le Samoa. E leai. E ala ona folafola, ina se’i sufi ma sula le ola foa’i ma le ola faasoa. Se’i manu le agalelei, le aao mafola, le teu faatupu ma le teu faatamalii. E fai e Samoa vii o le agalelei ma le ola foa’i. E oo lava i le malo ma le toga e faaevaeva ona o le ola foa’i ma le ola osiosi, e sula ma fai o latou vii e sulatoga.

E foliga mai o se aga faapea lea oloo naunau iai Paulo i tagata Kerisiano. E manatu Paulo, o le ola foa’i, o le faasinomaga o le tagata Kerisiano. Aisea? Leaga ua mua’i alofa mai le Atua. O le mataupu silisili lena o le ola foa’i. E ala ona tatau ona tatou foa’i ma tatala pea o tatou lima ma o tatou loto i le ola foa’i ma le ola faasoa, ona oloo faavae i le soifua foa’i o le Atua.

A na le alofa ma faasoa mai le Atua semanu tatou te le iloa foa’i, semanu e leai se ola, semanu e leai se malosi, semanu e leai se potu ma se atamai; semanu e leai ni taleni; semanu e leai ni ‘oa ma ni tamaoaiga; semanu e leai ni fanau e pei ona fai mai le fai Salamo: “O fanau o le tofi mai le Atua”; semanu e leai se faamagaloina o le tagata agasala; semanu e leai se faaolataga; semanu e leai se ola faavavau faatasi ma le Atua, e pei ona molimau Ioane: “Aua ua faapea lava ona alofa mai o le Atua i le lalolagi, ua ia aumai ai lona atalii e toatasi, ina ia le fano se tasi e faatuatua ia te ia, a ia maua le ola e faavavau.”

A oo ina faamatala le alofa ma le foa’i a le Atua i le tagata i mea ia, ona le toe fesiligia lea o le tatau ma le tatau ona foa’i mai le loloto o le agaga ma lona loto. Ae o le pona la ona e iai isi tagata seiloga e tauanau lo latou ola foi ona faatoa fai lea o se foa’i. E iai foi isi tagata seiloga e tulituliloa ni foa’i ona faatoa ano ane lea. E iai foi isi seiloga e uma ona fai le tomumu ma le faitioga ona faatoa fai lea o se foa’i ma foliga ai ua tiga le foa’i.

O vaivaiga ia o le ola foa’i na iloa e Paulo. O vaivaiga foi ia o le ola galulue faatasi ma le pulupululima faatasi o lea foi tatou te iloa, e le gata i mea e fai i o tatou aiga ma nuu, ae faapea foi i totonu o Ekalesia.

Ua malamalama lelei lava Paulo i vaivaiga ia o tagata o le aulotu i Korinito lea na ala ai ona fai lana faaupuga lea: “Ia taitoatasi ma foa’i e pei ona filifili i lona loto; aua ma le tiga, aua foi ma le faatauanauna; aua e alofa le Atua i le ua foi ma le loto malie.”

O le tau atina’eina o le lotu i le vai tau o Paulo, sa le gata ina faailoa ma folafola le Tala Lelei e le au aposetolo,

ae sa fai foi galuega alofa e ala i le Ekalesia e fesoasoani ai i isi tagata a isi foi aulotu. Sa avea la le au aposetolo ma avefeau latou te fe’avea’ia meaalofoa na foa’i mai le tasi aulotu i le isi aulotu. O le mafuaaga lea na alia’e ai le mataupu lea e pei ona tatou faitauina mai le tusi o Korinito.

O le manaia ia o le faata’ita’iga e Paulo o le mataupu lea. Oloo amata lava upu a Paulo i lona agaga mimita ona o le aulotu lea i Korinito. Fai mai Paulo, “a ou iloa lo outou loto fesoasoani, na ou mitamita ai i luma o Maketonia.....O lo outou ma’elega foi na tupu ai le losilosi o le toatele.”

E foliga mai o le aulotu lea, o se aulotu e lima foa’i. E foliga mai foi e fia mananao uma isi aulotu ia pei o Korinito i mea latou te fai. O le uiga lena o le upu a Paulo: “O lo outou ma’elega ua tupu ai le losilosi o le toatele.” E ui lava ina talanoa Paulo, ma mimita i le ola foa’i o le aulotu lea sa ia faatuina i Korinito, ae e lei tuufauina e Paulo le taua o le faamanatu ia Korinito le taua o le ola foa’i ma le ola faasafua o tagata taitoatasi.

“Ia taitoatasi ma foa’i e pei ona filifili i lona loto; ‘aia ma le tiga; ‘aia foi ma le faatauanauna; aua e alofa le Atua i le ua foa’i ma le loto malie.”

A silasila i le faiga o le faaupuga o le matua e le o talanoa Paulo i le aoo tetele o le aulotu. E leai. Oloo talanoa Paulo i le tagata lava ia e toatasi ma lana lava foa’i. Fai mai Paulo: “Ia taitoatasi ma foa’i:.. O lona uiga e le o aga’i Paulo i le aulotu ma le sao faaulotu, ae oloo talanoa Paulo i tagata taitoatasi o le aulotu i Korinito.

E taua i le vaai a Paulo tagata taitoatasi aua e ala ona lelei se aulotu ona o sao taua a tagata taitoatasi. A tofu sao uma la tagata taitoatasi o le lelei foi lena o le taumafaiga faaulotu.

E leai se eeseega o le mafaufauga lea o Paulo ma le talitouga faa-Samoa o le “taufai lafo ‘aso ma tafai togi maa.” O le mafaufauga o tagata Samoa, e mafua mai i le fauina o maota ma laoa. A le togi maa uma tagata mai e matutua e oo i tamaiti e tuai ma faaloaloa le faiga o le faavae o le fale.

faaauau itulau e sosoo ai

O LE LAUGA

A le tofu 'aso foi tagata e umi se taimi o tau fau le falealuga o le fale. Ae a tau fai togi maa uma ma taufai lafo 'aso uma tagata e vave ona taunuu le faamoemoe.

E lua aoaoga taua oloo taumafai Paulo e faamasani ai tagata taitoatasi o le aulotu i Korinito.

1. Ia foa'i ma le loto fuatiaifo lelei. Afai e te foai ma le loto malie ma le loto fuatiaifo lelei, ona le tauanauina lea o oe e fai se foa'i. O le a le tiga foi le foa'i ia te oe aua ua avea le foa'i o se mea ua e masani ai ma ua fai ma mea suamalie i lou olaga. Ia tatou manatua, e ese le mea e ta'ua o le faamanatu, ese mea e ta'u o le tauanau. E manatu Paulo, e le tatau ona tauanauina le ola foa'i. Ae tatau ona iloa e le tagata ola, o lona tiute faa-tagata soifua, o le ola foa'i ma le ola faaso. Ai lava se mataga o se aiga, mataga foi se nuu, mataga foi se aulotu pe a gaogao 'i ma mativa le ola foa'i o ona tagata taitoatasi. E le tatau la ona maua le mea lea e ta'u o le tauanauina lou ola foa'i. Ae tatau ona faaosofia mai le loto lelei ma le loto fuatiaifo.

2. O le ola foa'i o le meaalofa mai le Atua. Afai o le Atua na faia i tatou i lona faatusa o le Atua alofa ma le Atua foa'i, o lona uiga la e tatau ona atagia le ola foa'i i o tatou olaga.

Fai mai le upu a Paulo, "aua e alofa le Atua i le ua foa'i ma le loto malie."

Ia tatou malamalama lelei e le o le uiga o le tala a Paulo seiloga e te foa'i ona faato'a alofa mai lea o le Atua ia te oe. E leai. Ae peitai o le manatu o Paulo, e tatau ona mafua mai le ola foa'i o le tagata mai lona loto ua inu malie i meaalofa ma le agalelei fai fai pea a le Atua ia te ia. E tatau ona lagona e le tagata le faamalieina o

ia i meaalofa ma le faaso a le Atua i lona ola, ona faaosofia ai lea o lona alofa ma fai le foa'i.

Ia tatou manatua lelei e le ala ona foa'i le tagata ona ua tele ni ana mea pe ona o le tele o sona tamaoaiga o iai. E leai. O le ola foa'i, e le sa tatou mea, a o le meaalofa mai le Atua i le tagata. E le'i tuuina e le Atua i lou loto ina ua tele sou tamaoaiga. E leai. Ia tatou manatua foi e le tatau ona fai lau foa'i ona ua totoe se mea i lau faaso. E leai foi. Vaai lau foa'i i to mai le i'u pe to mai ni toe'aiga o lou soifua faaso. O lou soifua foa'i ma lou ola faaso, o foliga vaaia ia o le alofa ma le agalelei ua uma ona foa'i mai e le Atua ia i tatou taitoatasi. Afai la e te talitonu e alofa ma agalelei mai le Atua ia te oe, e tatau foi la ona atagia le alofa lena e ala i lou ola foa'i.

O le mea moni lava, afai e le o oe o se tagata foa'i, e le o oe foi la o se tagata alofa i le ituaiga alofa lea e finagalo ai le Atua. Alofa i le Atua, alofa foi i le tuaoi. E faapefea ona e alofa i le tuaoi, pe a fai e te le iloa foa'i, pe afai e te le iloa faaso, pe afai e te le iloa faatino le togi maa ma le lafo 'aso. O le mea moni, e tatau lava ona sula ma sufi le foa'i a le Atua i la tatou foi foa'i e fai.

O le fesili taua e tatau ona fai, afai o le foa'i o se vaega o le ola faa-Kerisiano, o a la mea e foa'i? O le mea mautinoa o le foa'i, e le o faatatauina na o ni tupe. E leai. E foa'i lou taimi, e foa'i lou atamai, e foa'i au taleni, e foai lau faamafanafana, e foai lau fautuaga, e foa'i lau tofa, e foa'i lou auai, e foai meaai, e foai avanoa, e foai foi tupe. E iai la tatou pese foi lea o le "Ave lou ola ia aoga." A vaai i upu o le pese lena e le o ta'ua ai lava ni tupe. Ae oloo faamatala ai le agaga moni o le ola foa'i o le tagata soifua mo le Atua ma ana

feau. Tatou te maua loa le agaga o le pese lena ona le tauanauina loa lea le ola foa'i, ae ua fai saoloto ma fai ma le loto malie.

O le mea moni lava, tatou te le matitiva i mea e foa'i atu. E matua tele lava. Ae ona ua tatou faapumoooina i tupe le mea e taua o le ola foa'i ona foliga ai loa lea ua tatou matitiva. Ae leai, o loo fau ma soloi le foai mai le Atua e avagalima ai lou ola e foa'i i le Atua ma lona finagalo.

O le isi mea ou te fia faamanatu, e tatau ona o faatasi le ola foa'i ma le ola saili. Ia tatou manatua, e le finagalo le Atua e fai faapepe tatou ina ia tuulima mai mea uma tatou te mananao ai. E leai. E tatau i le tagata ona saili ma tauivi ina ia na maua faamanuiga mai le Atua. E le tuulima mai e le Atua le potu ma le atamai. E leai. E su'e ma saili. E a'oga ma su'esu'e iai ona faato'a maua lea. E le tuulimaina mai se galuega. E saili ma tapena iai. O tulaga ma tofiga, e le tuulimaina mai ae tatou te saili ma tauivi iai. E oo lava i tupe, e le o mai lava latou. E leai. E saili ma tapena le tagata i auala e saili ai. A tele lau sailiga, tele foi lau tapenaga, umi foi taimi o faaalu i le sailiga o meaalofa mai le Atua, o le tele foi lena o le faaso mai a le Atua mo oe i meaalofa e fai ai lou ola foa'i.

'Aua tatou te nofoa'i. 'Aua foi le faamasaniina a tatou fanau i le ola nofoa'i ma le ola faatalitali. A ia tapena o tatou olaga e saili faamanuiga mai le Atua aua o ina e tamaoaiga ai le tatou ola foa'i.

O le ola foai o le Atua, na ia le taofia ai lona Alo pele e toatasi a ua ia foa'i mai e fai ma togiola ina faaolaina le tagata agasala.

Nove Vailaau FS,
EFKS Porirua.

MATINI LUTERU

1483 - 1546

O le Auupega o le Toe Fuata'i

O le Ala i le Faate'aina ma le Ekalesia (Excommunication)

(faaauau mai le masina o Me)

I le amataga lava, e le'i iai se manatu o Matini Luteru e alu ese ma le Ekalesia; tasi lava lona mana'o sa iai, o le fia faasa'oina lea o ni mea sese sa iai. O lona taumafai e faia le mea lea, sa osofa'ia ma faitioina ai o ia e le toatele o ta'ita'i o le lotu. O le faate'a ma le Ekalesia, o se mea lea sa fai i se tagata na te a'oa'o ni mea e le tusa ai ma talitonuga ma a'oa'oga a le Ekalesia. Peitai e le'i pa'u atu Matini Luteru i le itu lea ona na te le'i tete'e i ni faatonuga a le pope.

O le faatonuga mai le pope, (papal bull) o se tusi lea mai le pope i le Ekalesia, e faamanino mai ai le mea e tu ai le Ekalesia i soo se mataupu. Ona e le'i tusia faalaua'itele mai e le pope le mea e talitonu moni iai le lotu e uiga i togisala (indulgence), o lona uiga foi la e le'i solia e Matini Luteru se talitonuga o le lotu i lona fesiligia lea o lea mea o le togisala.

Ona e le mafai la ona faate'a Matini Luteru ma le lotu, o lea na fau ai e le pope se mailei i le tausaga e 1517, ina ia maua ai Matini. Ua tau faalataina atu Matini ina ia alu atu i Okosepeta (Augsburg) o le a fai ai se felafolafoa'iga o finagalo. A o Matini, ua leva lava ona mana'o e fai se felafolafoa'iga faapea e faaali ai manatu o tagata, o le mea lea na malie ai Matini e alu iai. Na

ia manatu o le a avea sea felafolafoa'iga ma mea e faamamaina ai le Ekalesia mai mea sese o faia e le lotu. Peitai ua avea lea feiloa'iga ma mea e fetau ai Matini ma ta'ita'i o le Ekalesia o lea vai taimi. Na amata lava ona faau mai tuua'iga ma faitioga e tauala mai ia Katinale Thomas e Vio Cajetan, (Katinale Tomasi).

Sa tootuli Matini i luma o le Katinale sosoo ai ma lona ta'oto fao i luma lava o Katinale Tomasi. Na faatonuina e Tomasi Matini e nofo i luga. Na nofo i luga Matini ma tootuli, ae toe faatonuina fo'i e Tomasi e tu i luga. Ma o le upu e tasi na tautala ai le Katinale na iloa ai e Matini le mafuaaga o lea feiloa'iga. "Faafo'i!" O le faatonuga ma'ama'ai lea a Tomasi. Ua iloa nei e Matini e leai se felafolafoa'iga e faia. Ona faalau mai ai loa lea e le Katinale le mea e tatau ona faia e Matini. Ua tatau ona faaali mai le salamo o Matini, toe faafoi ona manatu ua faasalalauina, ma ia ia folafola mai o le a ia le a'oa'oina mataupu e 95 na ia tusia ma faapipii i le faitotoa o le falesa, ma 'aua na te toe fai se mea e save'u ai le filemu o le Ekalesia.

O le mea moni, ua matua save'u lava e Matini le 'ulo vai vevela o le Ekalesia Kerisiano, ma e oo lava i le pope ua ia ta'ua Matini o le pua'a po'a 'aivao ua ia osofa'ia le tovine a le Alii. Na faatonuina

Katinale Tomasi ina ia aua ne'i faia se felafolafoa'iga i le feiloaiga i Okosepeta. O le faamoemoe moni lava o lea feiloaiga i Okosepeta o le poloa'ia lea o Matini e faafo'i ona talitonuga ua ia faasalalauina, a leai, ua saisai o ia ma ave faamalosi i Roma.

Ae ui lava e le'i maua se avanoa o Matini e talanoaina ai mataupu ua laga, ae mata'utia le manatu na ia faaalua. Fai mai a ia, ole faatuatua e ta'uamiotonuina ai, ae le o sakarameta. O Katinale Tomasi, e matua le paga lava ma Matini, ma e na ia iloa lelei lava lea mea. O lona le iloa o ni mataupu silisili mai le Tusi Paia e faavae ai ona manatu, o lea na ia 'e'e ai ma fai atu ia Matini, "Faafo'i au upu! Pe te talia pe leai, faafo'i!". A leai, o le a ou faamalaiaina oe ma mea uma e te faaalua." Ae na tautala atu Matini ma le filemu ma le loto tele e faapea, na te le faafo'iina ana upu ma ona talitonuga. Aua, fai mai a ia, soo se tagata lava e malamalama i le Afioga a le Atua, e sili atu ona malos i lana pule i lo le pule a le pope poo ona faufautua. Ae mata'utia le tali na fai ane e Katinale Tomasi. Fai mai a ia, o le pope e sili ona malos atu lana pule i lo le Afioga a le Atua.

Na sosoo lea ma le tuua'iina o Matini i le fia poto ma lona fai mai e na te mafai ona faauigaina le Afioga a le Atua, o se mea na o le pope na te faia. O lona uiga, ua lu'ilu'iina ma fesiligia e Matini le faavae atoa o le pule a le pope. Na fesili Matini pe aisea e manatu ai le lotu o le pope o le sui lea o Peteru. Ma le isi, aisea e manatu ai le lotu o le faavae o le faa-Katoliko o Peteru a o lea e fai mai Paulo, "Aua e le mafaia e se tasi ona tuu se isi faavae i le ua uma ona tuuina, o Iesu Keriso lea."

Na faaiu le feiloa'iga i le faatonuina e Katinale Tomasi o Matini e alu ese ma le fale.

Ina ua tuua e Matini Luteru le *faaauau itulau e sosoo ai*

“O le Alofa o le Faasinomaga lea o le Ekalesia”

mai le itulau e 2

Efeso 5:23-25. **Faavae i le Atua Samoa - E puipui le aganuu i le Tala Lelei.**

Ou te faatusaina le fesootaiga a le Atua i le Ekalesia, e pei o le fesootaiga o le tina i le faafaileleina o lana pepe ma le tausiga o lana fanau. O Iesu o le Ao o le Ekalesia - o le Atua le Tama, le Alo ma le Agaga Paia - o le Tolu Tasi Paia. O le Ekalesia o ona tagata ua talitonu, faatuatua ma mulimuli ia te ia, ua ave a Iesu Keriso ma Faaola, ma le Agaga Paia ma Ta'iala. O ana aupega o

le Tusi Paia ma le tatalo.

Ou te faatusa foi le faifeau ma lana aulotu i le mafutaga mafanafana a le tina failele ma lana pepe fou, ma lana tausiga ina ia ola lelei ma tuputupu malosi lona tino, mafaufau ma le agaga. O aupega lava e tasi e faaaogaina, o le Tusi Paia ma le tatalo. O le a le oo lava se manatu o le fai pepa i Sakarameta, sauniga lotu ma faatonuga mai le Faavae EFKS mo lana afaigaluega paia, ua uma ona tofofi ma faauina, faifeau, a'oa'o, tiakono, tina, tupulaga ma soo se tagata lotu.

E faapena foi le Fono Tele ma le

fesootaiga ma Komiti Laiti, Matagaluega, Pulega ma Ekalesia, aemaise foi le Mafutaga Aoa a Tina i totonu o Matagaluega, Pulega ma aulotu. Ua ta'ua o le “Mother Church”.

O au o matua fanau, o ‘i’oimata o fanau matua. O Iesu le Ao o le Ekalesia, e pele ia te ia le Ekalesia. O le tagata Kerisiano e tapua’i i le Atua ma mulimuli ia Iesu. O le fanau, o le meaalofa, o le tofi mai le Atua. O tama’i olive ua foaiina mai i matua, latou te tausia faapelepele ma vaai lelei, ina ia tuputupu a’e malosi i ona itu uma, faaleagaga, faale mafaufau, faaletino. O matua o ulua’i faiaoga o tamaiti. O Iesu o le Faia’oga Sili.

Na fai e le Atua le tagata i lona faatusa; o le tane ma le fafine na
faaauau itulau e 7

MATINI LUTERU

1483 - 1546

O le Aupega o le Toe Fuata’i

mai le itulau e 5

faamasinoga, ona ia tusi ai lea i sana uo e faapea: “Atonu e potu le katinale i mataupu tau Tomasi, peitai e le o se tagata Kerisiano e lelei sona atamai...” E tutusa lelei lava sona malamalama i le mataupu lea ma se malamalama o se asini e taina se laaupese.

O le faatusa lea a Matini na vave lava ona iloa e tagata, ma amata taina ai faatagata e tautau i puipui o fale, o faatagata o le asini oloo taina le laaupese, a o lona ulu, o le ulu o le pope.

O lona faia’ina pea i finauga ma Matini Luteru, o le na talosaga ai ia Sitopisi, o le tama faaleagaga o Matini ma o lona faufautua foi lea. Na talosaga o ia ia Sitopisi e talanoa ia Matini ina ia faafo’i ana upu ma ona talitonuga. Peitai e oo lava foi ia Sitopisi e le taitai ona tutusa lona malamalama i le Tusi Paia ma le malamalama o Matini, o lea na ia teena ai lea augani.

Ua mautinoa nei e Sitopisi o le ala umi i luma o Matini e tumu i faigata, ma ni faaiuga e ono faalavelaveina ai lona auai atoatoa i galuega tau i le Ituaiga o Aukusitino. O le mea lea na faasa’olotoina mai ai loa Matini e Sitopisi mai lana tautoga e auai i galuega tau le Ituaiga o Aukusotino. Mulimuli ane na ta’ua e Matini le faamutaina lea o lona auai i le Ituaiga o Aukusitino, o se tasi o ona faate’aga e tolu (ex-communication).

Na faatalitali Matini i Okisipeta mo lona valaauina e toe tulai i le faamasinoga mo faatalatalanoaga, ae ua fiu i faatalitali e leai se valaau. Na ia masalomia le ono lamatia o lona ola pe a faatali pea, o lea na ia sola ai i se solofanua i le tuneva o le po, na o lona ofuvae o ofu ma ona totini. Na fiafia o ia ina ua oo i Uitinipeka aua e alolofa tagata o le aai ia ia. O lea vaega o le atunuu, e tusa o le tolu kuata o

le aofai o tagata latou te lagolagoina Matini, ae na o le kuata latou te lagolagoina le pope. E le gata i lea, a o le perenise o lea itu o le atunuu, o Feterika, e alofa ia Matini ma o lea sa ia taumafai ai ina ia saogalemu le sola ese o Matini mai le itumalo o Okisipeta, seia oo o ia i lona aiga.

E lei faigofie le lagolago o Perenise Feterika ia Matini. Na faatonu e le pope ia Feterika ina ia pu’eina Matini ma tuu i le falepuipui, ona avatu ai lea i Roma i le pulega o le lotu; a le o lea, faasa ona toe alu atu i le itumalo o Uitinipeka. O le mea moni lava, a le usita’ia e Feterika lenei faatonuga mai le pope, e tuua’ia o ia i le faauiufi o le tagata e tetee i aoaoga a le lotu. Peitai e le’i mana’o Feterika e saisai Matini ma ave i Roma. O lea na ia talosaga ai i pulega faale-malo i Siamani, ina ia latou suesueina tuuaiga o fai aga’i ia Matini. Na fai atu foi Feterika ia Katinale Tomasi, e leai se mea e ala ai ona pu’eina Matini ma ave i Roma.

(Faamatalaina e

Afemata T. Apelu Aiavao

faaauau i le masina o Iulai

O le Mafuaaga o le Pese: Have Thine Own Way, Lord!

Isaia 64: 8: “A o lenei, le Alii e, o oe lava lo matou Tama; o i matou nei o le omea, a o oe le Tufuga; o le galuega a ou aao i matou uma.”

I se tasi po i se fono tatalo, na augani ai i le Atua se tama'ita'i faamatua tagata e faapea: “E leai lava se mea o iai poo le a le mea e te faia ia i matou, le Alii e, tau lava ina ia faia pea lou finagalo.”

Sa iai i le fono tatalo lea se isi tama'ita'i e igoa ia Atelite Polati (Adelaide A. Pollard), o se tama'ita'i lauiloa i le malaga mai lea nuu i lea nuu ma ia fai ai a'oga o le Tusi Paia. Sa faanoanoa lava lenei tama'ita'i ona ua ia le mafai ona maua se tupe e totogi ai lana malaga i Aferika e galue ai faamisionare. Na faalogo o ia o fai le tatalo a le tina lea o ta'ua i luga, ma e na oo ifo lava i lona agaga le uiga o upu o lea tatalo.

Ina ua fo'i o ia i lona aiga i lea po, ona ia faitauina ai lea o le tusi a Jeremia 18:3,4: **“Ona ou alu ifo ai lea i le fale o le fai ipu omea, faauta foi, o fai e ia lana galuega i luga o mea taavilivili. Ua leaga le ipu na ia faia i le omea, i le lima o le fai ipu omea; ona toe fai ai lea e ia o le tasi ipu e tusa ma le manatu o le fai ipu omea ona fai.”**

A o le'i moe Atelite Polati i lea po, a ua nofo i lalo ma tusi uma fuaiupu e fa o lenei pese o lolomi atu i lalo, fuaiupu oloo peseina pea e Kerisiano se'ia oo mai i le aso. O lenei pese na uluai lomua i le tausaga e 1907.

E tele lava aso o lo tatou olaga, e faavaivaia ai i tatou ma tatou pagatia, ma tatou le malamalama pe aisea e oo mai ai ia puapuaga ia i tatou. Peitai, ona o tatou o le fanau a le Atua, e tatau ai ona tatou malamalama ma 'aia ona tatou fesiligia uiga lililo o le finagalo o le Atua, ae tatou faapea ane pea, i upu o lenei pese:

Have Thine own way, Lord! have Thine own way
Thou art the porter, I am the clay,
Mold me and make me after Thy will,
while I am waiting, yielded and still.

Have Thine own way, Lord! Have Thine own way!
Search me and try me, Master, today!
Whiter than snow, Lord, wash me just now,
as in Thy presence, humbly I bow.

Have Thine own way, Lord! Have Thine own way!
Wounded and weary, help me, I pray!
Power, all power, surely is Thine!
Touch me and heal me, Saviour divine!

Have Thine own way, Lord! Have Thine own way!
Hold o'er my being absolutely sway!
Fill with Thy Spirit till all shall see
Christ only, always, living in me!

faaauau mai le itulau e 6

“O le Alofa o le Faasinomaga lea o le Ekalesia”

faia e ia. O le vavega ofoofogia lea na faai'u iai le foafoaga, o le lalolagi ma ona tagata, e le Atua. Finagalo le Atua ina ia avea le tane ma le ava ma tino e tasi, ma ia fanafanau ma uluola. O le pepe, e fofoa mai le fatu o le tama, ma le fatu o le tina. O le iva o masina e tau'ave ai e le tina le pepe i lona tagata, tulou. O le manava o le tina ua fai ma siosiomaga puipua ma malutia e fafagaina ma tausua le tuputupu a'e o vaega o lona tino. O le mea foi lea e taua ai le soifua maloloina ma le tausua faapelepele o le fafine to, poo le tina ua maua i le ma'itaga. E fanau mai le pepe, ua atoa lona tino, amata mai le ulu e tau i tamatama'ivae. Oka oka se isi foi vavega ofoofogia ua faia e le Atua!

Tatou te vaaia le tino o le pepe, e laitiiti mamao nai lo le tino o le tagata matua. Ua silafia ma tatou iloa uma, e mana'omia e le pepe se suasusu lelei ma meaai e fafagaina ai. Faatasi ma lavalava, se fale e nofo ai, tagata e tausua ma faafaileleina. Na lagona lava e le pepe leo ma mea e pa'o i le sefulu vaiaso ae le'i fanau mai o ia, aemaise o fagogo, talanoaga, faitauga tusi, pesepesega ma tatalo na fai iai, a o i totonu o lona tina.

“O oe ua lagolago mai ia te a'u talu ina fanaua o a'u; na e aumaia a'u mai le manava o lo'u tina; e le aunoa ona ou vivii atu ia te oe.” Salamo 71: 6.

O le taua ia o le tausiga faapelepele ma le faafaileleina lelei e le tina, o lana tama, e faatupula'ia ai pea le atina'e lelei o lona tagata atoatoa. Aemaise ina ia atina'e lelei ai vaega poo laasaga o le tuputupua'e o lona fai'ai. Ne'i

faaauau itulau e 8

"O le Alofa o le Faasinomaga lea o le Ekalesia"

le atina'eina lelei i lona laitiiti ona le toe matala pe toe maua avanoa e faalelei ai ina ua matua tele. Aua o le fai'ai lava e faatonuina ai le atina'eina o ona itutino.

*** O ona lagona - emotions - fiafia (ata), faanoanoa (tagi) e iai le mafuaaga e ala ai ona tagi, te'i - reactions/responses;

*** Fai'ai ua faafefeteina pe faate'ia - survival instincts - pe faasaga ma aga'i iai/tetee pe sola ese (fight or flight). A to'a le mafaufau ona mafai lea ona a'oa'oina ma taofi mau se a'oa'oga. Ae a fefe ma popole ua afaina le mafaufau ma lona iloa.

*** O le vaai, faalogo, sogisogi, tofotofu, gaoioi o vaega eseese o le tino - movement;

*** O le mafai ona a'oa'oina, matau ma manatua mata'itusi, numera, mataupu e vaai ma faitau iai - ability to learn and memorise -academic;

*** O le tomai e tusi ata, ta laau, tusi pese - creative;

*** O le mafai ona malamalama pe talia mea e le vaaia - abstract thinking - le to'a filemu pe a alu ese le tina ma le potu - overcome anxiety;

*** O le mafai ona faafilemu e ia lava ona lagona - fai ni auala e fo'ia ai faafitauli ma mea faigata - self regulation;

*** O le ausia o le mafaufau e mafai ai ona su'esu'e ai mataupu lavelave ma le loloto - research and analyze - deliberate.

E matua eseese lava tagata ma o latou uiga, amio, talitonuga ma siosiomaga na ola ma soifua mai ai. Poo se usoga foi mai matua lava e tasi, e iai lava eseese o ni mafaufauga, talitonuga ma amioga.

"Le Atua e, na e a'oa'o mai ia te a'u talu ina ou tamaitiiti, ua oo mai

foi i nei ona po ua ou faaali atu ou vavega." Salamo 71:17.

O mea e tutupu i le siosiomaga o le tamaitiiti, aemaise o le tali fiafia atu o matua i o latou mana'oga, faaletio, faale-mafaufau, faaleagaga e atina'eina ai iloa, lagona ma a'oa'oga o le lalolagi ma olaga o le fanau.

Ma e o nisi nei o talitonuga poo aiaiga oloo tausisia e le polokalame ua ta'ua o "Matua o Ulu'a'i Faia'oga" (PAFT) i Niu Sila ma atunuu i fafo. Oloo fesoasoani ma faasoa atu ai i matua nisi o alaga'oa ma manatu aua le faafaileleina saogalemu ma le lelei o tamaiti.

1. **Alofa Mafanafana** (Love and Warmth) - Ia atagia foliga o le alofa ma logo i tino matagi lelei o lagona mafanafana ua ta'ui ai lona siosiomaga. "*O le Alii, o lo'u Leoleo Mamoe o ia; e leai se mea ou te mativa ai. Na te ave a'u i le mea e iai le vao mu'a ou te ta'oto ai; na te ta'ita'i ia te au i tafatafa o vai e tafe lemu.*" Salamo 23: 1,2.

2. **Talatalanoa ma Faalogo** (Talking and Listening) - Talatalanoa ma faasoasoa upu ma lagona ma le faamoemoe ia faa'augofie le faalogo, e pu'epu'e maua ai le lasi o mea lelei mai isi tagata. "*Na te faafo'isia mai lo'u agaga. Na te ta'ita'i ia te au i ala o le amiotonu ona o lona suafa.*" - Salamo 23: 3.

3. **Faatonutonu ma ia Malamalama** (Guidance and Understanding). Faatonutonu malie ma le onosa'i se'ia oo ina malamalama lelei ma matala le mafaufau ona fua mai lea i le olaga lelei ma le fai mea fiafia. "*E ui lava ina ou savali i le vanu o le ata o le oti, ou te le fefe lava i se*

mea leaga, aua o oe ta te faatasi ma a'u, o lau laau ma lou tootoo e faamafanafanaina ai a'u." Salamo 23:4.

4. **Tua'oi ma Tapu(laa)/Pa Puipui** (Limits and Boundaries) - O tua'oi ma tapulaa o le olaga e aoga tele e faatonu folau ai le malosi faaoga tataua ae vaoia ai le ola soona fai e leai se mafaufau. "*E te laulau mai mea i le la'o'ai ma a'u i luma o e ita mai ia te a'u;*" - Salamo 23: 5a.

5. Tausisia Faaiuga ma talia Aafiaga (Consistency and Consequences) - O sologa to'amalie o mea e maua ina ua savali mautinoa i luga o le alafua e le lavelave ae na fuafua lelei ma tapenapena mae'a le ala. Ia manino aafiaga e faatatau tonu i le matua, malamalama ma se a'oa'oga e maua mai ai. "*.....ua e faauuina lo'u ulu i le suauu, ua taumasuasua la'u ipu.*" Salamo 23:5b

6. **Lalolagi Malu Puipuia/Saogalemu** (A Structured, Secure World) O se fesoasoani taua le ola a'e i totonu o se si'osi'omaga to'a filemu ma le malu puipuia mai faalavelave mata'utia. Ia saogalemu le ola o le tamaitiiti. "*E moni, e mulimuli mai ia te a'u le agalelei ma le alofa i aso uma o lo'u ola; ou te nofo foi i le fale o le Alii i aso e tele lava.*" Salamo 23:6

Ae o le a le taua o nei faasoa mo tatou? I so'u lava lagona faatauvaa, o ni nai manatu nei e taua mo le tausiga ma le faafaileleina o le pepe ma fanau. E pei ona tausii e le tina lana tama o le pepe meamea i le alofa le faatua'oaia, seia oo ina a'oga, talavou ma ave ma tagata matua, e faapena foi so'u lagona i le alofa mutimutivale faa-tina o lo tatou Atua. Pe iai foi se aoga i le va feagai ai o fesoataiga a le
faaauau itulau e sosoo ai

“O le Alofa o le Faasinomaga lea o le Ekalesia”

mai le itulau e 8

Aufaigaluega, Ta'ita'i ma aulotu, Mafutaga Tina, Pulega, Matagaluega ma le Ekalesia.

“O le alofa, o le faasinomaga lea o le Ekalesia.” “Love, the EFKS Vision and Mission”.

Poo le a se **“gagana o le alofa”**, e mafai ona faatino ai le autu o le Fono Tele 2014 - **“o le alofa, o le faasinomaga lea o le Ekalesia.”** **What is the best “love language” we can use as we continue to serve our God in our belief that “love is the EFKS vision and mission.”**

Upu Faala'ei'au - Words of Affirmation - Praise and thanks - verbal and written recognition.

O le faamalo ma faafetai atu i se lauga matagofie, le taitaiina filemu, le faamaopopo solo lelei, le faataunuina o se tiute, le teuteuina matagofie o se maota. Le faaali atu lagona o le fiafia, faafetai, faala'ei'au, faamalosi, faamafanafana, ma le faalototele. Le ta'u atu o lou alofa ma lou fiafia i se mea patino ua faia e se tasi mo oe, poo se auaunaga ua uma ona faatino. E taua ia te oe, le upu, le faamalo mai, le saunoa faafetai mai, nai lo meaalofoa foa'i mai. E le faavaivai loto i le soona 'ote, pe faaaoga ni upu masoa, pe ta'u soo ni mea ua faaletonu. **O le lauga a Iesu i luga o le mauga** - Mataio5.

Galuega Alofa - Acts of Service - Offering help or support - not taking others for granted.

E taua ia te oe le ofo atu o se fesoasoani, pe itiiti pe faatauvaa - tapenaina o se galuega, i feau o le fale, se auala e feaveaiina ai tagata fia malaga, i le galulue faatasi e faamama avega i soo se tiute. I lou ofo atu aunoa ma le fesili,

faatonu pe faamanatu atu. Fesoasoani matua i tamaiti, faapena foi tamaitii i matua - tama i tina - tina i tama - o le a se mea ou te faia mo oe e mafai ona ou fesoasoani atu ai: Galulue faatasi le tina o galuega ma mafutaga tina. **Mulumuluina e Iesu vae o le ausoo. “O le ala i le pule le tautua.”**

Taliaina o Meaalofa - Receiving Gifts - Not just token giving

E taua ia te oe, le agaga/lagona na foa'i atu ai se meaalofoa - e le o le tele poo le taugata, ae o se meaalofoa na fai faapitoa mo oe. A e saili meaalofoa mo se isi tagata, e te su'eina lava se mea e talafeagai, poo se mea e te iloa e taua pe fetau mo lena tagata. E taua le mafuaaga na fai ai, ae le na ona faataunu. E taua tele aso faapitoa, o aso fanau, ma aso faailogaina. E taua atu ia te oe, le ave poo le maua mai o se meaalofoa e faailoa ai le fiafia, nai lo le upu faala'ei'au, poo le faamimita o oe ese isi i sau mea na fai. Ae e te le faatali foi se'i oo i taimi faapitoa, 'a 'e lagona lava le fia fai meaalofoa, ua e faatinoina. E leai se isi meaalofoa e sili atu, nai lo lou tagata ua ofoina. **“Taulaga foa'i loto malie le faatauvaa. Taulaga a le tina mativa.”**

Taimi Taua - Quality Time

E taua ia te oe le taimi ua faaavanoaina e talanoa atu ai ma faalogo mai ia te oe. Tape le TV ma faasaga lelei mai/atu. E afaina lou lagona pe afai e fuafua se taimi faapitoa mo oe, ae tele taimi e le faataunu ai ona ua faamuamua soo nisi mea, pe tolo soo, ma foliga pisi tele i le mau mea. Fiafia e talatalanoa ma faasoa i manatu ma lagona. O le faataua o taimi e mafuta ai i taaloga, ma avanoa e mafuta ai samasamanoa, faaleaiga,

faaleuo, faale-Ekalesia, faalemafutaga tina. **Maria na fiafia e faalogo ia Iesu.**

Faapapa'i alofa - Physical Touch

E leai se mea e sili, nai lo lou pa'i atu pe pa'i mai foi se isi i le agaga alofa ma le faamafanafana, i taimi faanoanoa, mafatia ma le puapuagatia. E taua le sii o le pepe/tamaitiiti, faalatalata mai ia te oe, na te lagona ai le alofa, i soo se taimi, poo fafaga, taalo, talanoa. O lou faalatalata i se tasi, pe fusi atu/mai na te lagona ai le loto tele ma le faamafanafana ma le faamalosi. E faate'a ai lagona fefe ma le loto vaivai. **“Tina maua i le puna toto na faamalolo ina ua pa'i ia Iesu”**

Ia o se taumafaiga vaivai lena a le auauna faatauvaa i lenei taeao.

“A o fua o le agaga o le alofa, o le olioli, o le filemu, o le onosa'i, o le mataalofoa, o le agalelei, o le faamaoni, o le agamalu, ma le amio mama; e le faatulafonoina mea faapena.”

O le toe upu a le fai pepa, e momoli la'u faafetai tele i le paia o le Mafutaga Aoao a Tina o le Ekalesia, i lau Afioga i le Taitaifono ma le mamalu taue'e o le Laulau e tusa o la outou faaloalo maualuga e fai ai lo'u faatauvaa, o lo outou sui mo le pepa o lenei Fono Tele a le Ekalesia.

Tau ina faamanuia e le Atua o outou sao lelei uma faatina aua le aga'i i luma o se manuia o la ta Ekalesia e pele i le agaga.

Ia manuia le Fono Tele 2014

Soifua ma ia Manuia.

Rosettastone Iupeli

Mafutaga Aoao a Tina

“Mommie,” said 6-year-old Judy, “while you were away last night I looked for somebody to say my prayers to, but nursie had gone and auntie was talking on the phone, so I just said ‘em to God.”

Toe Vaai ia 'Oe i le Taeao

mai le itulau muamua

alu le tagata ia e moe pe o le a sauni e malaga i se isi atunuu, e fai mai lava ia, "Toe vaai ia oe i le taeao!" "See you in the morning." O se folafolaga sa tausila lava iai lo'u tina.

O le tama o lo'u tina o le faifeau ma o le mea sa masani ai i na tausaga pe tusa ma le 60 tausaga talu ai, a maluu se tasi o le aulotu, ona avatu lea o le ua maluu i lona pusa, ua tuu i le potu malolo o le faifeau, ina ia avanoa ai tagata o le aulotu e o atu e faamavae iai. O lea faiga i ia tausaga na o le valu tausaga lo'u matua, o se mea sa ou matua fefe ai lava.

O se tasi aso na ta'ta'i atu ai lo'u tina e lona tama faifeau i le potu malolo, ma fai iai e tago e tuu lona lima i le puipui o le potu.

"O le a lau faalogo iai Popi?" o lana fesili lea i lo'u tina.

"Ia, e malo ma malulu." o le tali lea a lo'u tina. Ona ia ta'ita'i atu lea o lo'u tina i le maluu ma fai atu iai, "O le a ou fai atu ia oe e te fai se mea e le faigofie ia oe ona e fai. Ae a e faia, e te le toe fefe lava i le oti. Ou te mana'o e te tago e tuu lou lima i le muaulu o Simiti."

Ona e matua alofa lava lo'u tina i lona tama, o lea na ia faia ai le mea ua fai atu ai.

"Ia, o le a lau faalogo iai?"

"Papa, e pei o le puipui o le potu."

"Ioe, e mo'i a oe. O le fale tuai lea o Simiti, a o la tatou uo o Simiti, ua alu. O le mea lea, Popi, e leai se mea e te toe fefe ai i le fale tuai lena o Simiti ua tuu. E le o toe iai Simiti."

Na mautu le a'oa'oga na fai e Papa ia Popi, ma le toe fefe ai i

lona olaga atoa. E le'i toe fefe ai lava i le oti.

E valu itula a o le'i oti lo'u tina, na fai mai ai sona mana'o uiga ese. A o matou tutu i tafatafa o lona moega ma tau taofi o matou loimata, ae fai mai, "Aua le aumaia ni fugalaau i lo'u tuugamau aua ou te le iai. A oo ina ou tia'i lenei tino, ona ou lele ai lea i Europa. E le avea lava a'u e lou tama." Ua talie nei le aiga i le tala a le loomatua, ma le toe iai ma ni loimata o se isi. A o matou sosi atu iai ma faatofa, ae fai mai, "Toe vaai ia oe i le taeao."

O le itula e 6.15am i le taeao o le aso na sosoo ai, na ou maua ai le telefoni mai le foma'i fai mai ua amata le malaga a lo'u tina i Europa e pei ona sa mana'o ai.

E lua aso ua te'a talu ona maluu lo'u tina, na matou iai i le fale o o'u matua, ma matou tapena ai a la mea o iai. Na matou tau atu ai i se faaputuga o pepa o ni ana tusitusiga. E tatala atu le faaputuga ae pa'u mai i lalo se isi pepa. O le pepa oloo tusia ai le solo oloo tusia atu i lalo. Ou te le iloa poo ia na tusia, poo se solo a se isi sa fiafia iai ma oo ina ia teua. Tasi le mea

na ou iloa, ona pau lea o le pepa na pa'u i lalo ina ua ou tatala le faila, o tusia ai le solo lenei:

The Legacy

When I die, give what is left of me to children,

If you need to cry, cry for your brother walking beside you.

Put your arms around anyone and give them what you need to give to me.

I want to leave you with something, something better than words or sounds.

Look for me in the people I have known and loved.

And if you cannot live without me, then let me live on in your eyes, your mind and your acts of kindness.

You can love me most by letting hands touch hands and letting go of children that need to be free.

Love does not die, people do. So when all that is left of me is love.....

Give me away.....

Na 'ata'ata lo'u tama ma tago mai i le 'u'u lo'u lima ma opo limatasi atu a'u. I le taeao o le isi aso fou.

tusia e John Wayne Schlatter
faamatalaina e
Afemata T. Apelu Aiavao

O le Ala lava lenei ia outou savavali ai

O le malaga faamisionare lona lua a le aposetolo o Paulo, na ia faaletonu ai pe o fea a aga'i iai lana malaga. Ua vaevae le latou aumalaga, ua o ese Panapa ma lana vaega, a o ia lea ua taitai i le isi vaega e iai Sila ma Timoteo. Na faamoemoe Paulo e aga'i i le isi itu, ae peitai ua le tatalaina e le Agaga o le Atua le faitoto'a. Ona liliu ai lea o le a aga'i i le isi itu, ae ua le tatalaina foi e le Agaga Paia le avanoa mo Paulo. Ua faaletonu Paulo poo le a le mea a fai. O le Atua na valaau Paulo e alu i Asia Itiiti e tala'i atu le Tala Lelei ia Iesu

Keriso, E foliga mai ua tapunipuni e le Atua avanoa mo le tala'iga o le Tala Lelei.

E le taumate na tatalo foi Paulo ma ana uo i le Atua e pei ona tatalo Tavita i le Salamo e 25 f4: "...ia e faailoa mai ia te au ou ala...." Ma o le aso lava na sosoo ai na faasino mai ai e le Atua le mea e tatau ona aga'i iai le malaga.

Na iai se faaaliga na iloa atu e Paulo e pei ona tusia i le Galuega 16: 9: Ua iloa foi e Paulo le faaaliga i le po, o le tasi tagata Maketonia ua tu mai, ma 'ai'oi mai
faaaauu itulau e sosoo ai

O le Alofa Uiga Ese

mai le itulau muamua

soo se tagata. Ou te ita i o latou uiga, a latou mea e fai, a latou tala. Ou te 'a'amu foi'i i o latou 'ofu ma 'ou faipona iai, i totonu o lo'u mafaufau. E le aliali mai i fafo ae 'o'ona lava i lo'u loto.

Ae iai le tagata e sili ona ou inoino iai e sili atu i lo se isi lava tagata i le lalolagi, o lo'u tama.

Ou te 'ino'ino i ona uiga. I la'u vaai i lo'u tama, (e faigata fo'i ia a'u ona ou ta'u o lo'u tama) o ia o se tamaloa e ona lava ia i aso uma i lo matou nuu. 'A 'e ola a'e i se tama'i nuu e le toatele ni tagata, e te malamalama i le uiga o la'u tala. E iloa e tagata uma o lo matou nuu o lo'u tama o le tagata e ona lava ia mai le taeao e oo i le po, toe malamalama a'e le taeao toe ona.

A o mai tamaiti i le matou a'oga, ou te faalogo atu lava o fai a latou tala e uiga i lo'u tama le la e ona i le auala, poo luma o se faleoloa, poo se paka, ma inu tautala ai. Faapea a latou ou te le amana'ia a latou tala. Ae matua tiga lo'u loto ma ou masiasi ona o le tamaloa ona o lo'u tama. Ou te 'ata i isi taimi i a latou tala, a o totonu o lo'u loto, e matua pupusa ai lo'u ita ma le inoino i lo'u tama. E tagi lo'u loto i le ma i tala a tamaiti e fai.

A ou alu i le fale e tuu ai meaai a povi, ou te tau atu ai i lo'u tina o faagaulua mai ai, i le mea o iai

fe'au a povi. O le mea lava lea na pa'u iai i se fasiga e lo'u tama. Ua le mafai ona tu i luga, ua putaputa uma ona mata ma ona laugutu i le fasiga e lo'u tama. Na ou tago atu ma fusi mai ma tau faatu i luga, ma ma fetagisi faatasi. Ma ou fai atu iai, "Mum, I love you! Mama, ou te alofa ia oe. Ta o ia i se isi mea ta te nonofo ai. Ta sosola ia i se isi mea!" Ma ma fetagisi ai lava faatasi. O isi aso ina ua oo lava ina matua leaga le ona a lo'u tama, ona ou aveina ai lea i le fale lava lea e tuu ai meaai a povi, ua saisai ma tuu ai, ina ua ou le toe mana'o e vaai iai nisi e o atu i lo matou fale, o ona. Ou te leiloa pe iai lava se isi atalii e sili ona inoino i sona tama e pei o a'u. E le gata ona o lona inu 'ava, a o lona fasi leaga o lo'u tina.

Ona oo ai loa lea i se sauniga faaevagelia na ou tuuina atu ai lo'u ola ia Keriso. O le alofa o le Atua e ala mai ia Keriso, na faatumuina ai lo'u tagata, ma e matua malosi na oo ina tafieseaa ai le ita ma le inoino i lo'u loto, ma liua atoa ai ou lagona. Ua mafai nei ona ou vaai lelei atu i lo'u tama ma ou fai atu iai, "Papa, ou te matua alofa lava ia oe." Ma e matua moni lava la'u tala na fai i lo'u tama. Na fai lea ma mea na pei e te'i ai lo'u tama.

Ina ua ou a'oga i se tasi

iunivesite, na oo ina ou aafia ai ina ua lavea le taavale na ou alu ai. Na fusi lo'u ua i se fusi sima ina ia 'aia ai ona gaoioi, ma ou alu ai i lo matou aiga. E le galo ia te a'u le taimi na sau ai lo'u tama i lo'u potu, ma fai mai ia a'u, "Iosia, e faapefea ona e alofa i se tama e pei o a'u?" (How can you love a father like me?)

Na ou tali atu iai, "Papa, ono masina talu ai, na ou matua inoino ia oe." Ona ou faamatalaina ai loa lea iai le aso na ou tuuina atu ai lo'u tagata mo Iesu. "Papa, ua ou talia Iesu i lo'u loto, ma ua ou tuuina atu lo'u ola mo ia. Ou te le malamalama pe faapefea ona galue Iesu i lo'u loto, a o ia ua ia tuuina mai ia te au le malosia ua mafai ai ona ou alofa atu i soo se tagata, tusa lava poo le a ona uiga. Ua mafai ai foi ona ou faamagaloina oe, ma faatupuina le alofa ia te a'u mo oe o lo'u tama moni."

E fasefulu minute mulimuli ane, ae tupu se mea na ou matua fiafia ai lava. O se tasi i lo'u aiga, se tasi na te iloa lelei a'u mai lo'u tamaitiiti, ua fai mai ia a'u, "Iosia, a mafai e le Atua ona fai mo a'u le mea ua ia faia mo oe, ou te fia tuuina atu foi lo'u ola mo ia."

Ma o le taimi lea na tootuli ifo ai lo'u tama, ma ou tootuli atu ai foi, ma ma tatalo ma taufai tuuina atu o ma ola mo Keriso.

**Success in life is a matter
not so much of talent as
of concentration and
perseverance.**

- C.W. Wendte

O le Ala lava lenei ia outou savavali ai

faaauau mai le itulau e 10

ia te ia, ua faapea mai, "Sau ia i Maketonia, ma fesoasoani mai ia te i matou." Ua iloa e ia le faaaliga, ona sauni loa lea o i matou e o atu i Maketonia, ua manatu lava i matou, ua valaauina i matou e le Alii e folafola atu le tala lelei ia te

i latou."

Na usitai Paulo i lenei faaaliga mai le Alii, ma oo ai ina amataina le faaevageliaina o le konetineti atoa o Europa.

I auga tupulaga uma lava, e naunau lava le au Kerisiano e fia faalogo i se faasinoga manino mai

le Alii o le mea e tatau ona fai. E pei foi ona fai mai le Isaia e 30: 21: "O le ala lava lenei, ia outou savavali ai.

E tatau ai foi ona tatou mautinoa lelei o lo tatou Alii o lo tatou leoleo mamoe e tatou te mulimuli ai ma usitai i le mea na te faasino mai tatou te savavali ai, e tatou te manuia ai.

“E Mativa le ua Galue ma le Lima Vaivai - a o e Malosi e Mau’oa i Latou.” - Faataoto 10: 4

Sa faigaluega Ruta o se teine faigaluega i le faato’aga, ae iloa atu ai e Poasa, ma na filifilia ai o ia e fai ma ana ava. O Elisara sa galue i le suotosinaina o le fanua, ae iloa atu ai o ia e Elia, ona ia filifilia ai lea o ia e fai ma ona fesoasoani. O Peteru, Iakopo ma Ioane sa fagogota ae iloa atu ai i latou e Iesu, ona ia filifilia ai lea o latou e fai ma ona soo.

O le Atua na te valaauina tagata e to’a’aga e galulue na te faia ana feau ma ave iai ana faamanuiaga. E le’i valaauina lava e Iesu nisi e paie e faia ana galuega, poo nisi na o le nofonofu ma faatalitali ni manuia, ae leai se mea e fai.

I le silafaga a le Atua, e leai ni tama’i galuega poo ni galuega e faatauva. E taua galuega uma. Poo oe o le tagata e aoina lapisi ma ave e tia’i, poo oe o le pule sili o galuega e tutusa lava: “.... o lenei e susesueina i auauna tausi mea ina ia iloa ai le tagata ua faamaoni.” Faato’a faaopoopoina atu ia te oe nisi mea se tele, pe a faamaonia lou faamaoni e galueaiina si mea itiiti oi ia te oe.

Fai mai le Faataoto 10 f4: “E mativa le ua galue ma le lima vaivai, a o e malosi e mau’oa i latou.” O lona uiga, a e le to’aga e galue, ma fai fai pea i aso uma o lou olaga, e tasi lava le mea e te maua, o le mativa.

“Ua tu’inanau le loto o le paie, ae leai se mea e maua; a o le mana’o o e filiga i galuega, e matua ma’ona ia.” Faataoto 13 f4. Ae fai mai foi le Faataoto 22 f29: “Ua e iloa le tagata ua faataalise i ana galuega? E tu o ia i luma o tupu,

ae le tu i luma o tagatanuu.”

O faamanuiaga e mulimuli mai i galuega, e pei ona mulimuli mai le seleselega i lou faato’aina ma galueaiina le fanua, ma fua mai.

Fai mai le Teuteronomie 28 f8: “E pule le Alii ia manuia oe i ou fale saito, ma mea uma lava e tago iai ou lima; na te faamanuia foi ia

**Ma le ulugalii
matutua sa
galulue i le
faato’aga
laau’aina i
tafatafa o le
faletalimalo i le
aai o Hiroshima, i
Iapani.**

te oe i le nuu ua foaiina mai e le Alii lou Atua ia te oe.” E faamanuia le Atua i au miti ina ia manuia galuega e te fai. Tasi lava o lea, e le fiafia le Atua i le tagata na o le moomoo ae le faia se galuega.

O Atamu ma Eva na faia e le Atua ma tuu i le Faato’aga i Etena e galulue ai. O tatou foi, e iai o tatou fanua ua tuuina mai e le Atua tatou te galulue ai. A le o lea foi, ua foaiina mai e le Atua le potu ma taleni tatou te faia ai isi galuega, pei o galuega i kamupani, i matagaluega a le malo, i pisinisi. E anoanoa’i galuega i le lalolagi, saili iai se galuega e te galue ai.

O tagata Saina na aumai e Siamani sa latou pulea Samoa i la tausaga ua mavae, ona o le le

galulue o o tatou tagata, na o le oso ma tuu oso ma tuu ae le galue pea lava pea lava pea i aso uma. O le galue faato’aga a le Saina, e amata mai i le valu i le taeao se’ia oo i le fa i le afiafi, i aso uma. E fua taimi le galue a le Saina. O le ala aumai lea e galulue i faatoaga a Siamani sa iai i lo tatou atunuu.

O le tausaga e 1973 na ou nofo ai i se faletalimalo i Hiroshima, le aai tele o Iapani lea na faapa ai e Amerika lana pulu atomika i le Taua Tele Lona Lua a le Lalolagi - 1939-1945. E pipii mai lava i le faletalimalo le faato’aga laau’aina, o tamato, kapisu, kukama, pi, ma isi. E tusa o le eka le tele o le faato’aga. Sa galulue ai se ulugalii matutua pe tusa o le 75 i le 80 tausaga lo la matutua. Ua nono’u o la tino ona ua matutua, pe mafua foi ona o le punonou i le faiga o le faato’aga. E tasi le vaiaso na ou nofo ai i le faletalimalo lea. Na ou matauina, e amata lava ona galulue le ulugalii i le valu i le taeao, ta le sefululua malolo, ta le tasi toe amata, ta le fa teu a la mea faigaluega ae malolo. I le vaiaso atoa na ou nofo ai i le faletalimalo i Hiroshima. Na ou matauina foi, e le fai fai nofonofu lea ma malolo ae le’i taina le taimi. Leai.. E fai ai lava se’ia ta le sefululua faato’a malolo; ta le fa manava.

A faapea ona tatou galulue i o tatou fanua, i tatou ia e iai fanua o tatou tua iai ae leai nisi a tatou galuega, e le mafai ona tatou matitiva. Tatou te selesele lava fua o le fanua i aso uma, ae le alu alu motu ona o le le galue i le isi aso.

O le ola na aumai e le Atua, o le ola e galue ai. Fai lena, ona faulala’i lea o meaai i lau laulau. Ma ‘e le ola faalagolago ai i isi tagata. E te le talepe fale ai foi.

- Afemata T. Apelu Aiavao

“Greater love has no one than this, that he lay down his life for his friends”

The priest Henri Nowen sat in the Hermitage Museum in St. Petersburg, Russia, for many hours meditating on Rembrandt's great painting *Return of the Prodigal Son*. While staring at the painting, Nowen gained a new insight into the parable: the mystery that Jesus himself became something of a prodigal son for our sakes. “He left the house of his heavenly Father, came to a foreign country, gave away all that he had, and returned through a cross to his Father's home. All of this he did, not as a rebellious son, but as the obedient son, sent out to bring home all the lost chil-

dren of God. Jesus is the prodigal son of the prodigal Father who gave away everything the Father had entrusted to him so that I could become like him and return with him to his Father's home.

In a nutshell, the Bible from Genesis 3 to Revelation 22 tells the story of a God reckless with desire to get his family back. God struck the decisive blow of reconciliation when he sent the Son on a long journey to planet earth. The Bible's last scene, like the parable of the lost son, ends in jubilation, the family united once again.

Elsewhere, the Gospel com-

ment on the extent to which God went to accomplish that rescue plan of love.

This is love: not that we loved God, but that he loved us and sent his Son as an atoning sacrifice for our sins.

Greater love has no one than this, that he lay down his life for his friends.

For God so loved the world that he gave his one and only Son.....

From the book:

“The Jesus I Never Knew”
by Philip Yancey

Maa Taua mai le Galuega Tautua a le Ekalesia O le Alofa e Amata i le Aiga

O le upu ‘Charity’ e mafua mai i le upu Farani ma le upu Latina o lona uiga - o le Alofa i e oloo Moomia (Love for the Needies)

Ae moni ma faamaoni le manatu autu: o mea lelei uma lava o le olaga, e tatau lava ona amata mai totonu o le aiga.

O le fesili tele lava oloo fai ma misiterio: Aisea e agalelei ma alolofa mai ai atunuu ma malo tetele o le lalolagi ia Samoa, a oloo toatele ma anoanoa'i tagata matitiva ma le fia'a'ai i o latou atunuu?

E pei ona molimauina e nisi

le tasi o nofoaga i le Setete o Kalefonia, Amerika, e lata i Downtown LA, oloo iai tagata e le o o'oo'o iai le alofa oloo moomia. O le tasi lea o aoaoga taua a Iesu, e pei ona faamanatu mai i lenei taeao - O le Alofa i e o Moomia - e amata atu i le aiga ma le nuu, e pei ona ia amata ai lana galuega faamaloloto i tagata o lona aiga ma lona nuu o Kalilaia. Ae pei foi ona faia e Iesu, na amata mai lona aiga ma lona nuu, ae le'i gata ai iina. Sa faasolosolo atu lava ma aofia ma isi aiga ma isi tagata e toatele. Ma pa'i tumutumu le

faatinoga o lona Alofa lea, e ala i lona maluu i luga o le satauro, mo le faaolataga e le gata o lona aiga ma lona nuu, a o le lalolagi atoa.

O lea foi le finagalo o le Atua mo la tatou komiti. Aua o lo tatou taumafai e faasafua atu le alofa mo e o moomia i isi tagata, e tatau lava ona amata atu i lo tatou lotoifale - i o tatou aiga, nuu ma le Ekalesia.

E toatele i tatou e na o le pepese lava ma taulagi leo tetele le alofa, ae fuamoia ma lona faatinoina.

Palemia Tauiliili FS

Taitaifono - Komiti o Aoga

Wesley was once asked how he got the crowds. He replied: “I set myself on fire, and the people come to see me burn.”

O La'ei o Iesu i le Satauro

Ioane 19: 23-24:

“Ua faasatauroina Iesu e tagata tau, ona latou ave ai lea o ona ofu, ua vaefaina, ta'itasi le tagata tau ma lana mea; i le ma le ofu tino. Ae leai se su'iga i le ofu tino, ua lalaga atoatoa, e afua mai i le pito i luga. Ona fetautalatalaa'i lea o i latou, “Aua tatou te saeia, ae se'i tatou fai ai le vili, poo ai le fai mona.”

Ona pau lea o le mea taua tau Iesu sa ia te ia, o lona ofu talaloa. O tu ma aga a le nuu o Iutaia, e fai e le tina se ofu faapea e na te tuuina atu i lana tama pe a oo ina alu ese atu ma le aiga. Pe na fai e Maria se ofu faapea mo Iesu, tatou te le iloa. Tasi le mea ua tatou iloa, e leai se su'iga i le ofu, a ua lalaga

atoatoa mai le pito i luga se'ia oo i le pito i lalo. O le a le mea e taua ai lenei mea?

Ua faamatalaina soo e le Tusi Paia o o tatou ofu, e faaalua ai o tatou uiga. Ua uuna'ia tatou e Peteru ina ia tatou oofu i le loto maulalo. - 1 Peteru 5: 5. O loo ta'ua foi e Tavita tagata amioleaga faapea e oofu i latou i le fetuu. - Salamo 109: 18: “Na pulupulu o ia i le fetuu e pei o se ie pulupulu...” O ofu e tele ina faaali mai ai uiga o le tagata. Faapea foi le ofu talaloa o Iesu - e faailoa mai ai lona tagata mama, e leai se su'iga; e le soosoo'a lona tagata mama, e solo atoa lona lelei.

O lana amio, e pei o le ofu e leai se su'iga. Na faia mai le lagi, mai le finagalo pa'ia o le

Atua, se'ia oo mai i le lalolagi na faatinoina ai e Iesu. Mai loifofoga o le Atua, i le alofa o Iesu.. Mai le upu a le Atua se'ia oo atu i le tali a Iesu e faataunuu. O uiga o Iesu e faatusa i le ofu e leai se su'iga, e solo atoa lona lelei.

Ae ina ua faatautauina Iesu i le satauro, ona to'eseina ai lea o ona ofu e leai se su'iga, a ua ia ofuina ofu o le faamaasiasina ma tauemuga ma le le lavalava. Ua ofu i le ofu o le le lavalava i luma o lona tina vaavaai mai ma ona aiga. Ua foliga mai ua manumalo ta'ita'i o le lotu Iutaia, a ua to'ilalo le Alo o le Atua. Ua ofu foi o ia i le ofu o le agasala - o le le lavalava. Aua ua ia tau'avea a tatou agasala i lona tagata i luga o le satauro. O a ofu o Iesu i luga o le satauro? O agasala! O a'u agasala ma au agasala. O ofu o le faasalaga.

O le Faamama Avega a le Tupu fou o Sipanioro (Spain)

Ua faau le 'ula a le tupu o Sipanioro o Juan Carlos, 76, i lona atalii o Perenise Felipe, 46 ina ua faatautoina o ia i le palemene a lea atunuu i le masina nei e fai ma tupu e sui i lona tama.

Na matua le fiafia tagata Sipanioro, (Spain) ina ua alu se fanafanaga elefane a lo latou tupu o Juan Carlos i Aferika i taimi o loo mafatia tagata o Sipanioro ona o le lelelele o le tamaoiga o loo iai. Tusa o le kuata (25%) o tagata o le atunuu e leai ni galuega.

Peitai e uiga ese mea na manao iai Perenise Felipe mo

lona faauuga. E leai se 'aiga tele e faia, e leai ni tupu ma ni ta'ita'i o isi atunuu e valaauina e pei ona masani ai i faauuga o se tupu. E leai se uaina, na o nai taumafa mama e tutu lava ma taumamafa ai ma talatalanoa, ae leai se 'aiga e nonofo i lalo. Fai mai Perenise Felipe e fia ola faalatalata i le tulaga o le tamao'aiga oloo iai tagata o lona atunuu. O le manatu, e manaia foi sia faaaoaoga mo tatou.

Ua talanoaina soo ona o le laga pea e nisi o matagaluega o le Ekalesia ia latou Tofiga Tele, le mataupu i le faamama avega i o tatou tagata lotu. O lea

mataupu ua faamalo mai ai nisi o nusipepa a lo tatou atunuu i le tatou Ekalesia Faapotopotoga Kerisiano Samoa, ona ua a'e se tofa i le Ekalesia e tau faamama ma faaitiitia faaaloaloga e fai soo, i mea e pei o moliga faifeau, poo osiga feagaiga a aulotu ma faifeau; faaulufalega o malumalu, maota o faafeagaiga ma maota o aulotu, atoa ma maliu.

O le mea moni lava e le faigofie ona gagau mata le laau. Ae ua mafai ona fai e isi faifeau ma aulotu. O nisi pulega ua le toe faia ni talilauga na o le teutusi o le pasese e ave; ua le toe faia ni faaoso o faifeau, na o le inati lava poo le tofa, ma le teutusi. O isi foi ua na o le faifeau toaina lava e fai lana tofa, a o isi faifeau, ua na o

faaauau itulau e sosoo ai

O le Faamama Avega a le Tupu fou o Sipanioro (Spain)

teutusi o iai tupe i totonu.

Fai mai le augani a le Faifeau Toeaina o Popo Su'a i lana pepa na fai i le Fono Tele i Malua 2014: "Ia mataala pea le aufaigaluega, ina ia mautinoa oloo taitaiina le Ekalesia e le alofa o le Atua, ae le o le aganuu....."

".....o le alofa lo tatou faasinomaga ae le o le faaaloalo....."

Ma o le faaaloalo lea oloo sese ona fai ma tatou mafatia ai, lea na saunoa ai foi le Toeaina ia Oka Fauolo i le Fono Tele i Malua a o le'i maluu, "ua soona fai." Fai mai a ia e lelei le aganuu, a ua soona fai.

E le mafai foi e Taitai poo Tama o le Ekalesia ona taofi tutu faaaloaloga e fai, leaga o mea lelei ia o a tatou tu ma

aganuu. A o le faalavelave lava o tatou, o le soona fai. E tatau lava ona fai ma le faautauta; fai fuafua. Fai ma le alofa i le mafatia o tagata. Ia pulea a tatou mea e fai i le alofa, ae le o le faaaloalo e pei ona saunoa le Susuga Popo Su'a FT.

O le mea e sili ona taua, o le a sa tatou tali i le mana'o ina ia faamama avega? O le tatou tali - amata. Amata ona fai se suiga tusa lava pe laitiiti a ua iai. A masani, ona gasolosolo ai lea ona faigofie ma le matamuli ai i le le tetele o ni faaaloaloga e fai.

Ou te toe fia ta'ua le faifeau ua uma foi ona ou ta'ua i se isi tausaga.

Osi le feagaiga a le aulotu ma le faifeau. Na savalivali iai e leai se mea na 'avea. O'u fai atu iai, "Matua e ulu malo sole!" 'Ae

'ata ma tali mai, "Te iloa oe, ua ou fiu e su'e i le Faavae o le Ekalesia e leai se mea o iai e uiga i ni oo o faifeau." O'u toe fesili, "Na lolotu la nisi i le Aso Sa na sosoo ai?" Ae tali mai, "Tumu! Matua tumu atu le sauniga lotu lea i lo le sauniga i lo ma Aso Sa muamua!"

Afai na mafai e le faifeau lea, e tatau fo'i ona tatou mafatia e tatou? Tatou te mana'omia nisi latou te faatu ni matati'a, ona tatou tati'a lea iai. Tusa lava pe lele atu le ti'a apili i le 'ulu lea e pito mai, e leai se mea o iai. O le mea sili ua ta le ti'a. E oo lava ina malie lana lele pe a faamasani i le tati'a.

Fai mai le mau a le Fono Tele 2014: "O le alofa, o le faasinomaga lea o le Ekalesia."

- Afemata T. Apelu Aiavao
Faatonu o le Sulu Samoa.

Faapa'ia le Maota fou o le Aulotu i Apia

faaauau mai le itulau muamua

O le fale tuai sa i luma o le maota o le faifeau, a o le fale fou ua tu mai i le pito lava i tua o le fanua oloo iai le maota o le faifeau. O le aulotu e sili i le 40 matafale, oloo galulue ai le Susuga Utufua Naseri ma le faletua ia Taia'opo.

O le sauniga o le umusaga sa ta'ita'ia e le Susuga i le Toeaina Faatonu o le Pulega a Apia, o ia foi o le Failautusi o le Komiti a le 'Au Toeaina, Susuga Kerisiano Soti.

Sa auai foi le Afioga i le Taitaifono o le Ekalesia, Susuga Tauti'aga Senara ma le faletua. O le tala o le galuega na saunia lea e le Faafeagaiga a le Aulotu i Apia, Susuga Rev. Utufua Naseri FS. Sa auai Faifeau Toeaina o le

Matagaluega, faapea ma faifeau o le Pulega a Apia.

O le faapa'iaina o le maota o le aulotu i Apia, sa le faateleina, leai se vevesi, puupuu foi le sauniga. Sa fai le taumafataga i luga o laulau. Sa fai foi faaaloaloga i le Aufaigaluega a le Atua, ae le'i soona faia foi. Ua faamama avega lava. O le aulotu i Apia e matua maopoopo lava ma malosi le Mafutaga a Tina. Ua masani ai lava latou i le faamaopoopo ma fai mea lelei mo le galuega a le Atua.

O le upu a Samoa fai mai o le itupa o tina o le itu vaivai. A o le toatele o aulotu ua matauina lava, i mea e fai, toe maopoopo, o tina e tatau ona ta'u, o le itupa malosi. Le tioa foi fai mai, na o tina na au le latou ina'ilau.

Babies Can Talk?

Little Margaret asked her father when their new baby would talk. He told her not for two years, since little babies don't talk. Said Margaret, "Oh yes they do. Even in the Bible they do."

"Who did?" asked the father. She replied, "Sister read the Bible to us this morning and I heard with my own ears that Job cursed the day he was born."

The Bible on Public Speaking:

The 9th verse, 14th chapter of First Corinthians reads:

"Except ye utter by the tongue words easy to be understood, how shall it be known what is spoken? For ye shall speak into the air?"

O E UA MALILIU

Fagapeti Pasipasi Palea'ae

31 Tesema - 1925 - 21 Ianuari 2013

O le Afioga i le alii tiakono matua o le Ekalesia EFKS i Palmerston North, Matagaluega Niu Sila i Saute.

O lona sauniga faale-aiga o au sa taitai, lauga Pava Tofaeono FS, EFKAS, tatalo Pastor Fala Mailo.

E le faigofie se upu molimau ile soifua auaua o lenei tama. O se tama tiakono ua iloga lona faiva faa-tiakono i lenei Ekalesia. O ia lava o se molimau soifua i le mana faaola



o lona Matai, o le e ona le galuega. Sa galue fiafia ma faamaoni i le mea na gata ai lona malosi i le tino. O se tama uiga tusaafia ma loto faatuatua aemaise le fiafia e tatalo.

O lona toe sauniga sa faia lava i le malumalu EFKS i

Palmerston North, ma sa taitai ai le Toeaina Faatonu ia Popo Su'a. Sa faitau Tusi Paia Nevin Atoa FS, ae lauga Elekana M. Tuialii FS, o au sa molimau.

Na faaiu ai i lona oliolisaga tumau i le fanua tanu i Kelvin Grove Cemetery.

“Le auaua lelei e ma le faamaoni, ulufale maia i le fiafia o lou Alii.”

Periti Fauolo FS,

EFKS Parmerston North.

(Na uluai faasalalauina atu le maliu lenei i le Sulu Samoa o Setema 2013, peitai e le'i sa'o le sipelaina o suafa o le ua maliu. Faamalulu atu i le aiga alii.)

Faatonu o le Sulu Samoa

Lupematasila Taulaga Palu

27 Novema 1938 - 10 Mati 2014



O se tasi o tama matua o le Ekalesia, ma o le faaaloaloga o le nuu i Si'ufaga, Falelatai, ua tuumalo i lona 76 tausaga a ua 21 tausaga o lona tofi tiakono, ae ua 20 ai lea o tausaga o la ma mafutaga i le Ekalesia ma le nuu.

O se tiakono ma se tama loto maulalo, to'afilemu, loto alofa ma agalelei i soo se tasi e

mana'omia se fesoasoani. E le sii soo a o lana tofa loloto sa faamalosi'au i galuega uma na faatino a le Ekalesia, e pei o le fausiaina o le fale o le faifeau, o le hall, se'ia tauluga lana tautua i le lagolago malosi i le fausiaina o le malumalu. O se tama e talitonu i le Atua ma ana faamanuiaga i le ola tautua aua e fiafia i le ola fai taulaga ma alofa foa'i i soo se faifeau aemaise lava i la matou mafutaga.

O lona sauniga faale-aiga sa ou taitai ma faia le upu faamafanafana, a o lona toe

sauniga i le Aso Lulu 19 Mati i le EFKS i Si'ufaga, sa taitai ai le Susuga i le Toeaina Faatonu ia Tauti'aga Senara; tatalo Simeona Taefu FT, lauga Caesar Samuelu, faitau le Tusi Paia e le Susuga ia Oteta Taule'alo, a o a'u na faaulufaleina lona sa, faia le molimau ma le taitaina o lona toe sauniga i lona oliolisaga tumau i lona maota i Si'ufaga.

“Amuia lea auaua e maua mai e lona Matai oloo faapea ona fai.” Manuia lau malaga.

Rev. Opapo Soana'i Oeti.

**The outward lives of
God's people should
be indicative of the
possession of inner
spiritual wealth.**

**All that is best in the
civilization of today
is the fruit of
Christ's appearance
among men.**

- Daniel Webster